

**Sveinssafn og Krýsuvíkirkirkja. - Greinargerð Jónatans Garðarssonar,
formanns Vinafélags Krýsuvíkirkirkju, 19.2. 2013**

Árið 1997 sameinaðist hópur áhugafólks um Krýsuvíkirkirkju um að hvetja Þjóðminjasafn Íslands og bæjaryfirvöld í Hafnarfirði um að lagfæra kirkjuna og nánasta umhverfi, en á þessum tíma var kirkjan í afar slæmu ásigkomulagi. Erlendur Sveinsson og bræður hans voru helstu hvatamenn í þessu máli enda tengdist kirkjan og kirkjugarðurinn minningu föður þeirra Sveins Björnssonar sem var jarðsettur þar. Málið fékk góðan framgang, kirkjan var gerð upp, þar var boðið upp á fróðleik og gönguferðir, og það sem mestu máli skipti var að reglulegt helgihald hófst þar að vori og hausti. Sveinssafn í Krýsuvík var mikilvægur hlekkur í þessari keðju þar sem jafnan var boðið upp á messukaffi í Sveinssafni að þessum athöfnum loknum, auk þess sem synir Sveins sáu til þess að kirkjan var þríf, þar var jafnan gestabók og gerðu kirkjunni sitthvað fleira til góða. Þegar kirkjan var 150 ára voru stóðu þeir bræður og Sveinssafn að því ásamt sóknarnefnd Hafnarfjarðarkirkju, séra Gunnþór Ingasyni, séra Gunnari Kristjánssyni prófasti Kjalarnessprófastsdæmis og fleiri velunnurum kirkjunnar að haldið var veglega upp á þetta merka afmæli. Athöfnin vakti mikla athygli og fjölmenni sótti afmælismessuna sem haldin var í kirkjunni og megnið af fólkinu sat úti á hlaði og hlustaði á það sem fram fór í gegnum hátalarakerfi. Síðan var öllum viðstöddum boðið til veglegrar veislu í Sveinssafni.

Þegar Krýsuvíkirkirkja brann á nýársdag 2010 efndu félagar úr áður nefndum hópi til stofnfundar um byggingu nýrrar kirkju í Krýsuvík. Enn á ný komu synir Sveins Björnssonar og Sveinssafn inn í myndina og það er næsta víst að tilvist safnsins og tengslin við sögu Krýsuvíkirkirkju styrkti þá sem stóðu að stofnun vinafélagsins í trúnni á að þetta verkefni væri þess virði að leggja út í það. Vinafélagið hefur haldið í heiðri þá hefð að halda helgistund í Krýsuvík í sumarbyrjun eins og áður, þó þar sé ekki nein kirkja enn sem komið er. Kirkjubyggingin gengur mjög vel og vonir standa til að kirkjan verði komin á sinn stað innan eins til tveggja ára. Þegar boðið hefur verið til helgistundar við kirkjugrunn Krýsuvíkirkirkju hefur oft verið kalt í veðri og afar notalegt að vita til þess að rjúkandi heitt kirkjukaffi og meðlæti bíður í Sveinssafni og þangað er öllum boðið sem sækja þessar helgistundir.

Það er álit mitt að það verði nýrri Krýsuvíkirkirkja og öllu starfi sem henni tengist í náinni framtíð mikilvægt að eiga hark í horni eins og Sveinssafn hefur verið og mun án nokkurs vafa verða áfram. Sem formaður Vinafélags Krýsuvíkirkirkju hef ég átt mjög gott samstarf við syni Sveins Björnssonar og það er einlæg trú mín að ef Sveinssafns hefði ekki notið við hefði verið mun erfiðara að sjá Krýsuvíkirkirkju fyrir sér sem lifandi helgidóm og griðarstað í framtíðinni, eins og kirkjan hefur verið um aldir.

